

## ذره رماد

برغم الألم . برغم الذل . برغم الهوان  
لسه بحاول أطيب جراح كرامتي م الإمتهان  
وبرغم شبابى . لكنى شبت قبل الأوان

-----

وكان الامل جوايا فوق العناد  
وكنت بحارب فى دنيتي رغم البعاد  
وكان ضميرى فى غربتى .  
هو سلاحى وهو العماد

-----

وكنت كثير فى وحدتى تناجينى الدموع  
وكان حبك ينادينى إمتى الرجوع  
وكان إسمك فى قلبى وجوه جوه الضلوع

-----

ولما رجعت ليكى بعد بعدى عنك  
حسيت بغربه مع إنى جوه حُضنك  
إزاي تكسرينى وأنا لسه بحبك

-----

فضلت ماشى هايم فى الأماكن  
حسيت بذكرياتي معاكي ولكن

العنكبوت معشش جواكى وساكن

-----  
حسيت كيانى كله زلزله إعصار  
ولقيت أملى معاكى إنهار  
وأحلامى صابها دمار  
-----

سنين من التعب والعرق  
هو أنا جيتك عشان نفترق ؟  
وأشوف بعينى صد و جمود  
فين نسيم هواكى . صفاء سماكى ؟  
طب فين حُبك والوعود  
يارتنى كنت بالنسبه ليكى نقطه مياه  
قطره ندى . حبة رمال فى نسمه هوا  
كنت هاشعر إني ليا وجود  
ولا أنى أكون سدى  
لأنى رغم البعاد . زاد العناد  
ورجعتك كطفل فى المهاد  
وشوقى ليكى فى إزدياد .  
لكنى مشاعري صابها الندم  
لما خليتني بالنسبة ليك  
ذره رماد . مصيرها العدم